

EXPO

"E LENS DI MI WOWONAN"

DEDICA NA FAMOUS DIAZ Y SPEED ANDRADE



SR. Pierre Rafini, Country Manager di RBC-Bank hunto cu Leo Vrolijk, den presencia di Pedro Famous Diaz a habri e exposicion "E Lens di mi Wowonan" ayera nochi na Archivo Nacional Aruba. Esaki ta di 7 exposicion cu Leo Vrolijk ta organisa den cuadro di celebracion di Dia di Prensa. Den su discurso ayera nochi, sr. Pierre Rafini den nomber di RBC a felicita tur miembro di prensa p'e celebracion di e dia aki y a reconoce e trabou importante cu prensa tin den e comunidad. Pa loke t'e exposicion, Pierre Rafini a señala cu RBC ta sumamente orguyoso di ta un biaha mas e patrocinador di e exposicion di prensa "E lens di mi wowonan". "Tur aña e exposicion ta un exito y nos ta sigur cu e aña aki e di 7 edicion lo ta mas exitoso ainda". Di e forma aki RBC ta contribui na desaroyo di prensa na Aruba y ta duna Prensa e elogio y respet cu nan ta merece. Sr. Leo Vrolijk a duna di conoce cu e aña aki tin alrededor di 300 potret cu a participa den e exposicion aki. E ta sumamente contento cu tur aña su coleganan di Prensa ta contribui grandement cu e exposicion. E exposicion lo ser dedica na dos persona hopi conoci den mundo di periodismo cu ta sres. Nelson 'Speed' Cabral de Andrade y Pedro 'Famous' Diaz. Speed Andrade mes ayera nochi no por tabata presente, pa motibo di trabao na Santo Domingo y a laga su amigo y colega Patrick Paskel lesa e discurso cu e mes a prepara. E biaha aki probechando di e exposicion, RBC tin un seccion den e Expo aki di 'RBC Blue Water Project' unda lo tin tur e potretnan di e Competencia di Fotografia: 'E bunitesa di nos Awa' exponi pa tur bishitante por admira. Hopi bunita mes. Despues di e parti oficial, ayera nochi na Archivo Nacional, a sigui un recepcion masha anima, unda e presentenan por a mira e potretnan cu a trece recuerdonan nostalgico. E exposicion aki lo keda habri pa publico general for di awe 2 di september te dia 14 di september na Archivo Nacional entre 8.00 am y 4.00 pm. Entrada ta gratis.